

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : LISAN**

**DARIPADA : TENGKU RAZALEIGH HAMZAH  
[ GUA MUSANG ]**

**TARIKH : 8 APRIL 2014**

**RUJUKAN : 6606**

**SOALAN:**

**Tengku Razaleigh Hamzah [ Gua Musang ]** minta **MENTERI DALAM NEGERI** menyatakan berapakah jumlah mangsa sindiket penipuan melalui internet yang telah membuat aduan kepada pihak polis dan apakah langkah-langkah yang telah dan akan diambil bagi membanteras kegiatan tersebut yang dikatakan kebanyakannya didalangi oleh pendatang asing.

## **JAWAPAN:**

**Tuan Yang di-Pertua,**

**Kerajaan sedar dan peka kepada *trend* jenayah masa kini terutamanya peningkatan kes-kes jenayah siber. Fenomena ini bukan hanya berlaku di negara ini sahaja tetapi seluruh dunia memandangkan penggunaan media elektronik telah menjadi budaya masyarakat kini. PDRM telah mengambil langkah proaktif bagi membendung gejala ini dan memastikan rakyat tidak menjadi mangsa penipuan jenayah siber ini.**

**Antara langkah yang diambil untuk menangani jenayah ini termasuk yang menggunakan nombor palsu Bukit Aman dan juga agensi lain seperti Bank Negara, Bank-bank dan jabatan kerajaan yang lain iaitu:-**

- i) Menjalankan siasatan dan membuat tangkapan terhadap sindiket yang telah dikenalpasti dan menuduh mereka di mahkamah jika mempunyai cukup bukti.**
- ii) Bekerjasama dengan penguatkuasa luar negara terutama dengan polis Taiwan dan China dalam soal maklumat risikan memandangkan *CALL CENTER* sindiket Macau Scam dipercayai beroperasi di negara berkenaan.**
- iii) Hebahan kepada rakyat melalui media massa, media cetak, TV dan radio serta media sosial PDRM (Laman Web, Facebook dan**

Twitter) untuk tujuan peringatan serta kempen kesedaran kepada rakyat bahawa jika mereka menerima panggilan hendaklah menghubungi pihak polis untuk memaklumkan kejadian atau membuat pengesahan maklumat yang diterima.

- iv) Memberi nasihat dan hebahan kepada rakyat bahawa tidak pernah pihak bank atau agensi jabatan kerajaan meminta wang untuk dipindahkan ke akaun individu bagi tujuan keselamatan daripada mangsa yang terlibat.

Pihak yang menjadi mangsa perlulah memberikan maklumat kepada pihak polis untuk menjalankan siasatan dan masyarakat disarankan jangan cepat mempercayai dan terpedaya dengan sebarang dakwaan, tawaran, pujukan, pemberian hadiah dan rayuan yang diberikan oleh pihak yang tidak dikenali tetapi perlulah merujuk kepada pihak yang berkenaan terlebih dahulu untuk pengesahan panggilan yang diterima.

Jumlah mangsa sindiket penipuan melalui Internet yang telah membuat aduan kepada pihak polis adalah seperti berikut:-

TAHUN	KES	KERUGIAN (RM)
2009	971	6,697,766.21
2010	2258	23,361,566.44
2011	3627	43,334,942.03
2012	2897	52,424,323.96
2013	3051	42,212,321.85

**PEMBERITAHUAN PERTANYAAN  
DEWAN RAKYAT, MALAYSIA**

PERTANYAAN : LISAN

TARIKH : 8 APRIL 2014 ( SELASA )

DARIPADA : Y.B. DR. HAJAH SITI MARIAH BINTI MAHMUD  
[ KOTA RAJA ]

**SOALAN :-**

**Y.B. DR. HAJAH SITI MARIAH BINTI MAHMUD [ KOTA RAJA ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan jumlah pesuruhjaya bangunan di seluruh negara dan langkah Kementerian untuk mengupayakan Jabatan Pesuruhjaya Bangunan (COB) untuk menangani masalah pengurusan hakmilik berstrata.

## **JAWAPAN :-**

Tuan Yang di-Pertua,

Untuk makluman Ahli Yang Berhormat, Bahagian/Unit Pesuruhjaya Bangunan hanya terdapat di kawasan Pihak Berkuasa Tempatan (PBT) yang mempunyai bangunan berstrata. Pada masa kini, terdapat sejumlah 71 Pejabat Pesuruhjaya Bangunan (COB) di seluruh Negara.

Daripada 71 buah PBT tersebut, sejumlah 68 PBT mendapat bantuan emolumen daripada Kerajaan Persekutuan sejurus selepas penguatkuasaan Akta 663 pada 12 April 2007. Manakala 3 lagi Bahagian Pesuruhjaya telah ditubuhkan lebih awal seperti Dewan Bandaraya Kuala Lumpur (DBKL) dan Putrajaya ataupun PBT baru iaitu Pasir Gudang.

Bermula pada tahun 2008, Kerajaan Persekutuan di bawah Kementerian Kesejahteraan Bandar, Perumahan dan Kerajaan Tempatan (KPKT) telah menempatkan sejumlah 187 orang pegawai dan kakitangan di seluruh Negara dengan bantuan perbelanjaan emolumen RM5.3juta setiap tahun bagi membantu PBT.

Tanggungjawab bagi pengukuhan struktur perjawatan di PBT adalah terletak di bawah PBT tersebut. Oleh yang demikian, PBT berkenaan perlu mengemukakan kertas cadangan ke Jabatan Perkhidmatan Awam bagi tujuan kelulusan perjawatan baru. Sebagai contoh, saya difahamkan Majlis Perbandaran Subang Jaya telah diluluskan penambahan kakitangan Bahagian Pesuruhjaya Bangunan daripada 6 orang sehingga berjumlah 20 orang serta menaikkan taraf jawatan Ketua Unit Pesuruhjaya Bangunan. Di peringkat kementerian pula, pihak Kerajaan Persekutuan telah meluluskan sejumlah 7 jawatan tambahan yang keseluruhannya berjumlah 22 orang di Cawangan Pengurusan Strata, Sektor Kesejahteraan Bandar, dan 44 orang di Tribunal Pengurusan Strata di KPKT pada November 2013 bagi tujuan pengukuhan struktur dan pemerkasaan urusan berkaitan pengurusan strata seluruh Negara.

Kementerian Kesejahteraan Bandar,  
Perumahan dan Kerajaan Tempatan

April 2014